

# Waageclique Rhywälle

Basel 1991



---

*Fasnacht 2004*

*Sujet:*

## **Losch au alles liige..?**

*Basel wird zem Mischthuffe*

Mir verzelle kai Misch und dien is sehr entrischte,  
unseri liebi Stadt duet als wie mehr vermischte.  
Es reggt is uff, was alles umme liige duet.  
Bi däm vyyle Abfall paggt is langsam d Wuet.  
Henundebuggel, muess me alles falle loh,  
dr Näggscht soll denn im Abfall stoh?  
D Suubermänner kemme kuum mit butze noh,  
eso kas doch waissgott nit wyter goh!

### **Vom Bruederholz bis aaben an Rhy unseri Stadt soll wieder suuber si**

Kuum hett dr FCB e Sieg errunge,  
gumpen die Alte mit de Junge  
und fiire luttstargg ihren FCB,  
doch hesch speeter denn dr Märtblatz gseh?  
Gnecheldief sinn mir im Abfall gstande,  
wie kan all das so schnäll am Boode lande?  
Drei Stund Jubel, drei ganzi Stund voll Wonne  
und speeter zaigt denn d Abfallwoog drei Tonne.

### **Mir wänn nit numme dr FCB gwinne gseh e suuber Basel zellt fir uns no vyl vyl meh**

Wär Jung isch stoht uss Heefligkait,  
hett friehener dr Drammdiräggtter gsait.  
Jetzt haissts: Wär Jung isch gheit Nundefahne  
nit iberall si Abfall aane!  
Denn sisch nit geil und mega out,  
wie unseri Stadt langsam versaut.  
Lueg d Glaibasler Riviera aa nonere Summernacht,  
denn verstohsch au Du, was is so Kummer macht.

### **D Strossewischer wische sich d Bäässe wund dä Drägg bringt unser Stadtbild uff e Hund**

E Fahrt mit Drämmli oder Bus,  
isch bi däre Sauerei kai Gnuss.  
Iberall liige Zytigen umme, de kasch kuum hogge  
und dräggig sin au d Sitz, es jaggt is uss de Sogge.  
Dym Mittagsässe sottscht nit im Drämmli fröhne  
und Dir nit dr Döner Kebab im Waage ynedröone.  
Me duet sogar mit Abfallbolizische ummefahre,  
das viele Gäld kennt me doch logger spaare.  
Und das do hängge mir gärn no dra,  
e suuber Basel foht in dr Kinderstuuben a.

### **Combinodrämmli, hosche hoo gäll Du duesch hit suuber ko**

Bi dr Rhybutzedde sin ganzi Velo fiire ko,  
wär hett ächt die dert iinedoo?  
Gang doch emool zer Fläschedeponie  
dert dänggsch, das ka doch gar nit sy.  
E Riesesauerei mit Fläsche und Abfallgugge.  
Kenne die Fläsche d Fläsche nit ynedrugge?  
En SVPLer schreit, das schläggt kai Gaiss ewägg  
Ussländer und Asylante mache all dä Drägg.  
Doch lueg Di um und denn merggsch gli,  
unseri Schwyzer kenne au Sauniggle sy.

### **E Jeede macht si Drägg am beschte sälber ewägg**

Mir spiile nit so gärn fir Dii dr Umwältbolizischt,  
drum gib doch Sorg zer Stadt und mach kai Misch.  
Mir gniesse d Fasnacht und heere uff mit bälle,  
blyb suuber, winsche sich d Rhywälle.

---

*E suuberi Sach isch d Ladärne-Usstelig uffem Minschterblatz  
und d Waageparade bi dr Kasärne, gang go luege!!*

*Dää Zeedel het is wie allewyyle d Druggerei Bürgin in Birsfælde druggt. Dangee.*